

Dithero tsa Tirelano mo Kutlwanong

40/2015 Thero ka Sontaga wa 08 morago ga moletlo wa Borarobongwe, e le ka 26. 07. 2015

Moletlo wa go gopola pulo ya kereke

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno, letsatsi le, le kwadilwe mo go Baef. 5:8b-9 , le re:
"Tsamayang jaaka bana ba lesedi - gonne leungo la lesedi ke molemo otlhe le tshiamo le boammaaruri."

Le le okamelang letsatsi la go gopola pulo ya kereke, le kwadilwe mo go Pes. 84:2-3: **"Kana maago a gago a mantlente jang wena MORENA wa masomosomo! Mowa wa me o tihologeletswe, o fegelelwa malapa a MORENA. Pelo ya me le nama ya me di dudueletsa Modimo o o tshedileng."**

1. Sefela sa 413 -381/397

2. Thapelo: Mowa o o Boitshepo, a o tle, o re fe ditsebe tse di utlwang, tthaloganyo e e tthaloganyang, le dipelo tse di dumelang Morwa Modimo Jesu Keresete, Mopholosi wa rona. Amen.

3. Lefoko la Testamente e kgologolo la Sontaga wa 8 morago ga moletlo wa borarobongwe le kwadilwe mo go Jes. 2:1-5;

la moletlo wa go gopola pulo ya kereke le kwadilwe mo go Jes. 66:1-2;

Epistolo ka fa thulaganyong ya 2 Sontaga wa 8 morago ga moletlo wa borobongwe e kwadilwe mo go Baef. 5:8b-14;

ya moletlo wa go gopola pulo ya kereke le kwadilwe mo go Tshenolo 21:1-5a;

Efangele ka fa thulaganyong ya 3 Sontaga wa 8 morago ga moletlo wa borobongwe e kwadilwe mo go Joh. 9:1-7;

ya moletlo wa go gopola pulo ya kereke le kwadilwe mo go Luka 19:1-10.

4. A go ipolelwe tumelo ya bokeresete!

5. Sefela sa 414 - 382/398

6. Thapelo ya mmadi wa thero.

7. Efangele ya lefoko la thero e kwadilwe mo go Joh. 2:13-25, e re: "Jaanong Tlolaganyo ya Bajuta ya bo e le gaufi, mme Jesu a ya kwa Jerusalema. A fitlhela ba ba rekisang dikgomo le dinku le maeba le baananyi ba madi ba ntse mo Tempeleng. Ya re a sena go dira seitei ka megala, a ba kobela kwa ntle ga Tempele botlhe, le tsona dinku le dikgomo; madi a baananyi a a tshololela fa fatshe, le dipati a di menola. A raya bone ba ba bapatsang maeba a re: 'Tlosang dilo tse fa! Se direng Ntlo ya ga Rre ntlo ya thekelo.' Foo barutwa ba gagwe ba gakologelwa gore go kwadilwe ga twe: 'Go tlhoafalela Ntlo ya gago go tla nja.' Ke fa Bajuta ba mmotsa ba re: 'O ka re bontsha sesupo sefe gore o ka dira dilo tseo?' Jesu a ba araba a re: 'Digang Tempele e, nna ke tla e tsosa ka malatsi a le mararo.' Foo Bajuta ba re: 'Tempele e, e agilwe dinyaga di le 46, mme ke eng fa wena o re, o tla e tsosa ka malatsi a le mararo?' Mme ene o ne a bua ka ga Tempele ya mmele wa gagwe. Jaanong e rile a sena go tsosiwa mo baswing, barutwa ba gagwe ba gakologelwa gore o kile a bua jalo, ba be ba dumela Lokwalo le lefoko le Jesu a le buileng. Erile a le mo Jerusalema ka moletlo wa Tlolaganyo, batho ba bantsi ba dumela mo leineng la gagwe, ka ba bona ditshupo tsa gagwe tse a ntseng a di dira. Mme Jesu ka esi a se ka a ba ikanya, mo a ka ba ipolelelang, ka a ba itse botlhe, a sa tlhoke go bolelelwa sepe ka ga motho; gonne ene ka esi o ne a itse se se mo mothong." Amen.

8. Thero: Phuthego e e rategang ya Morena wa rona Jesu Keresete, mo sebakeng sa kajeno go na le maikaelelo a ba ba phololelang fa gare ga Bajuta ba ba tlhoafaletseng tumelo ya bone, ba tshegediwa ke bakeresete ba ba bidiwang Basione ba ga Keresete, ba ikaelela go aga Tempele ya boraro. Bajuta ba le bantsi ba dumela gore mo nakong ya Tempele ya boraro go tla tswelediwa kakanyo ya kagisanyo fa gare ga merafe ka sekete sa dinyaga, e le ya "Millennium." Botlhe ba ba latelang mogopolo oo ba ntsha mafoko a Beibele go tshegetsatsa maikaelelo a bone. Go na le megopolo e e farologanyeng e e gopolwang gore maikaelelo ao a tla diragadiwa. Mogopolo mongwe o a re: Tempele eo ya boraro e tla agiwa fa thoko ga ntlo e kgolo ya Bamohamede e e tlhomeseditse ka setlhomeso sa gouta e e agilweng mo felong ya Tempele ya bobedi kwa Jerusalema, mo godimo ga lefika le le amogelwang ke bone, fa e le kwa Abrahamana a ne a baakanya aletare go tlhaba Isaka teng.

Ka tsotlhe tse di akanngwang ka maikaelelo ao a go aga Tempele ya boraro go itsiwe gore ba rata go e aga ka ditena, gongwe ka matlapa. Le fa go ka diragala gore ba kgone go dirafatsa

ka fa maikaelelong a bone (kana go na le bahumi ba le bantsi ba ba tsieditsweng ka megopolo eo), go itsiwe ka tlhomamo gore tempele eo e tla bo e se Tempele ya boraro ya Modimo ya nnete. Jesu o tlahositse sentle, ya re a sena go koba ba ba rekisitseng, le ba ba rekileng mo Tempeleng ya bobedi, a re: "Digang Tempele e, nna ke tla e tsosa ka malatsi a le mararo." A raya Tempele ya mmele wa gagwe, o e leng Kereke, gongwe phuthego ya gagwe. Ke gore Jesu o setse a agile Tempele ya boraro e e leng Tempele e e sa tsholeng e digwa ka gope, e e nnelang ruri, e agiwa ka ditena tse di tshelang tse e leng badumedi ba gagwe tse di tsenngwang mo dibotaneng tsa Tempele ya boraro ka go kolobediwa mo leineng la Modimo o e leng Rara, le Morwa, le Mowa o o Boitshepo. Ke kago e nngwe e e sa agiweng ke batho, le e seng mo felong ya Tempele ya bobedi. **E e agiwang ke Keresete ke Tempele ya boraro ya nnete.**

Ka moo o se ka wa tsiediwa ke bone ba ba lorang ka ga go aga Tempele ya boraro ka matlapa, gongwe ka ditena tse di rekiwang kwa Corobrick. Kana ga dirafala jang, fa Jesu a ineetse go koba bale mo Tempeleng ya bobedi, le fa a ne a itse gore Tempele ya mmele wa gagwe e tla feta ele, jaaka a buile gore Jerusalema le Tempele ya bobedi ya sebaka sa gagwe, tsotlhe tsa teng di tla nyeledisiwa fela ke go digwa le go fisiwa ke baba ba Bajuta? Re tshwanetse go tlhokomela mafoko a Pes. 69:10, a a reng: "Gonne go tlhoafalela Ntlo ya gago go njele, le dikgobo tsa bona ba ba go kgobang di nkwetse." Pesalome e e bua ka ga dipogo tsa Motlhanka wa Modimo yo o neng a rongwa go bolawa ka ntlha ya go tlhoafalela Ntlo ya Modimo. Ga solofediwa mo Testamenteng e kgologolo gore Mopholosi yo o tloeditsweng o tla tlhoafalela Ntlo ya Modimo ka tlhoafalo e kgolo. Ka mafoko a mangwe re re: Mesia o solofeditswe, o tla go diga Tempele ele. A rongwa go dirafatsa tse di solofeditsweng ka ga Tempele e e neng ya agiwa ka matlapa. Go gongwe ga solofediwa go re "mme dipitsa tse tsotlhe tse di mo Jerušalema le mo Juta di tla itshepela MORENA wa masomosomo; mme botlhe ba ba tliang ditlhabelo ba tla tla, ba tsaya dingwe tsa tsona, ba apaya ka tsona; ka letsatsi leo go tla bo go sa tihole go le morekisi mo Ntlong ya MORENA wa masomosomo," Sag. 14:21.

Ka Jerusalema o mošwa re a utlwa gore ga go nke go duelwa sepe ke batho, ka tsa ditlhabelo tsa teng, batho ba tla abelwa ba sa duele sepe. Ntlo ya Modimo ga e a agiwa go nna ntlo ya thekelo, gongwe ntlo ya go ngangisana ka tlhwatlhwa, gongwe go tsietsana, gongwe ntlo ya go faposa tshiamo ka neo, gongwe go reka sengwe mo Modimong. Ga re letlelelwe go leka go didimatsa bogale jwa Modimo jwa go galefela maleo a rona ka ditlhabelo, gongwe ka dikabelo

tša mefutafuta. Ke molato fa pele ga Modimo, fa motho a ikanya gore Modimo o tla itumelela motho yo o lekang go ithuanyana le ona ka go ntsha tse di botoka, gongwe tse di durang bogolo. Ke megopolo ya batho ba tlhago ba ba sa ntseng ba bofilwe ka boheitane ba itsietsa ka ditimetso tse di ntseng jalo. Ga di dire mo Modimong wa boammaaruri o o tshelang. Go leka go reka sengwenyana mo go ona go ne go tswaletswe kwa ntle, go tswa mo tshimologong. Modimo ga se yo o ka tsiediawang, ga a tsietsegi.

Le ditlhabelo tse du tlhomilweng mo thabeng ya Sinai ke Modimo ga di a tlhomelwa go reka sengwe mo Modimong, jaaka go kwadilwe mo go Baheb. 10:4 gore "Gonne go a pala gore madi a dipoo le a diphoko a tlose maleo." Ke ka ntlha ya moo, fa Moitshepi wa Modimo a itshekisa Tempele ya borraabo mo melaong e e leng moriti wa tse di molemo tse di tlang, e ne e se setshwantsho sa nnete sa tsona tota, jaaka go kwadilwe mo go Baheb. 10:1 gore "Gonne e re ka molao o na le moriti fela wa dilo tse di molemo tse di tla tlang, e seng tsona tota, ga o ka ke wa dira ka gope, gore ba ba atamelang ba nne ba ba tletseng ka ditlhabelo tse di tshwanang tsa ngwaga le ngwaga tse ba ntseng ba di isa ka gale." Bajuta ba ne ba batla sesupo mo go Jesu, ba re: "O ka re bontsha sesupo sefe gore o ka dira dilo tseo?" Karabo ya gagwe le tiro ya go itshekisa Tempele e ne e le tiro e e supetseng, fa e le Mesia. Motho o ne a sa letlelelwe fela ka fa melaong ya Bajuta gore a tsene fela mo Tempeleng go koba ba ba neng ba na le tshiamelo go rekisa mo go yona, le go menola dipati tsa bone. Ba ne ba batla sesupo. Jesu o ne a ba naya sesupo, a ba raya a re: "'Digang Tempele e, nna ke tla e tsosa ka malatsi a le mararo.' Foo Bajuta ba re: 'Tempele e, e agilwe dinyaga di le 46, mme ke eng fa wena o re, o tla e tsosa ka malatsi a le mararo?'" Re a itse gore sesupo seo ke go supa kgakgamatso e kgolo, e bong tsogo ya gagwe ka letsatsi la boraro mo losong. Mme bale ba ne ba sa mo utlwe, ba gopola gore o bua ka ga kago ya Tempele fela, ba supa gore ba ne ba sa dumele se a se buang, ba re: "Tempele e, e agilwe dinyaga di le 46, mme ke eng fa wena o re, o tla e tsosa ka malatsi a le mararo?" Ya re go sena go feta gape dinyaga tse e seng tse dintsi, ka ngwaga wa 70, ga tla Baroma ba diga Tempele ele ya bobedi.

Mme yona Jesu a neng a bua ka ga yona, e bong mmele wa gagwe o ne a tsosiwa ka letsatsi la boraro, Bajuda mmogo le Pontio Pilato ba sena go mmapolela mo sefapaanong, le boNikotemo le Josefa wa kwa Arimathea ba sena go mmaya mo phupung.

Tempele e Jesu a buile ka ga yona e ne e le Tempele ya mmele wa gagwe, e e leng Tempele ya boraro ya nnete e Modimo o kopanang le batho mo bo yona, ke nama ya gagwe ya botho e a tsalwang a na le yona ka go tsalwa ke Maria wa lekgarebe. Mo mmeleng wa ga

Keresete, mo phuthegong ya gagwe re kopana le Modimo ka kopano ya nnete tota, le fa go diragala mo kagong e e agilweng ka ditena, e re gopolang pulo ya yona ka go e lebogela kajeno, mme re kopanngwa le Mopholosi wa rona mo mmeleng wa gagwe bogolo fa re amogela mmele wa gagwe mo senkweng, o e leng mmele wa nama ya gagwe e e tsositsweng mo phupung, e e galaleditsweng. Jesu yo e leng Modimo ruri, le motho futhi ruri; mo peresoneng ya gagwe boModimo jwa gagwe, le botho jwa gagwe bo kopantswe mo peresoneng ya bobedi ya Modimo. Jalo re itshwarelwa maleo a rona, jaaka re fitlhilwe mmogo le ene mo losong lwa gagwe, le go tsosiwa mmogo le ena mo tsogong ya gagwe, re tle re tshele le ene mo mmeleng wa gagwe o e leng phuthego ya gagwe. Mo go yona re na le botshelo ka ntlha ya tsholofetso ya gagwe, e seng ka ntlha ya go amogelwa mo ntlong ya kereke fela, go diragala fela mo ntlong e ya kereke e re gopolang pulo ya yona kajeno, tota-tota go diragala, fa re utlwa lefoko la Modimo mo yo yona. Go a diragala, fa go kolobediwa, le go itshwarelwa maleo mo leineng la Modimo o o Borarobongwe, fa re amogela mmele wa ga Keresete le madi a gagwe a re a tshologeletsweng, le go amogelwa ka molomo ka go dumela gore ka tiro e kgolo eo re itshwarelwa maleo a rona. Mo mmeleng wa ga Keresete go tsosiwa le ba ba tlhokafetseng gore e nne ba ba tshelang mmogo le ene, ba tshele, e nne ditokololo mo mmeleng wa gagwe.

Ditlhabelo ka ditshedi tsa Testamente e kgologolo e ne e le ditsholofetso tse di supileng setlhabelo se se neng sa tlhajwa ka go bapolelwa mo sefapaanong, e le sa loso lwa ga Jesu. Tsa Testamente e kgologolo e dirile fela ka go nna ditsholofetso tse di boleletseng pele gore sa nnete se tla diragala kwa Golegota.

Ka jalo Jesu Keresete ke Tempele ya bofelo ya boammaaruri. Mo Tempeleng e ya boraro Modimo o beile leina la ona le le pholosang, kwa Modimo o agileng teng le go agisanya teng le badumedi ba ona. Mo Tempeleng eo Rraagwe Jesu Keresete o direla ka Mowa wa gagwe ka boammaaruri. Mo go yona Jesu o teng; mo go yona Modimo o itshwarela maleo, mo go yona o tshegofatsa batho. Mo go yona legodimo le atla lefatshe, se se sa lekanngweng se kopana mo go yona le se se lekanngwang, mo go yona go tsena jo bo se nang tshimologo, le e seng bokhutlo mo sebakeng sa lefatshe. Mo go yona go diragala gore le fa gare ga rona baleofi ba kolobediwe mo leineng la Modimo o e leng Rara le Morwa le Mowa o o Boitshepo, mo go yona baleofi ba a utlwa gore ba itshwarelwa maleo a bone, mo go yona ba amogela mmele le madi a ga Keresete. Amen.

9. Thapelo: Morena Modimo Rara yo o mo legodimong, re a leboga gone Morwao Jesu Keresete o phantshitse matlho a rona gore re lemoge gore kereke ya rona e e neng ya bulwa ka thapelo le lefoko la gago gore e nne Ntlo ya thapelo, gore re kopanngwe le wena mo go yona ka lefoko le disakaramente. O nne o re thuse gore re gopole maikaelelo ao a gago gore re se nyatse lefoko la disakaramente, mme re rate ka metlha go utlwa lefoko la gago, le go amogela boitshwarelo jwa maleo a rona mo leineng la ga Morwao Jesu Keresete, re gopole gore re kolobeditswe, le gore re dumele, fa re baakanyeditswe manno mo botshelong jo bo sa khutleng ka loso le tsogo ya ga Morwao Jesu Keresete, Morena, Mopholosi wa rona. Amen.

Thapelo ya Morena: Rara wa rona yo o mo legodimong ...

10. Sefela sa 265 -247/257

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke K. H. Schnackenberg, ka ngwaga wa 2015.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.

